

Enno'sa' Kareta Ipuru Amu' Ena'

Ekamanin

Enno'sa' Kareta Ipuru Amu' Ena' e'menuka'pu tamu'kuru' tawon kon Kari'san amu' ena', tewa'nomanin kon epamu wenai Kari'san pe te'to' kon uya apurito' innonkapai te'san. Imenukanin uya to' pori'mapitu' to' uya apurito' yau Sises Kurai esi i'nai ri Papa usenpoikasa' pe tukai' enpoika tauya wini kuru. Seri kupu tauya pi' osoruwawon ton i'nairon ton pi' iyetu'kapitu: wapiya, Sises esi inkeru' ri Papa Mumu pe, isenupasa' ru'pu i'nai ri main awiri e'nito' pi', Ikuipunu pi' tekota'mato' tunmoronka'pu poro. Papa Mumu pe tesi ke, Sises esi eke pe pu'kena' amu' Penaro' Ekonekan nito' awon kon, inseru amu' miri awonsi'ki Mosi' ri entai. Itisakon pe, Papa uya Sises ekamasa' inkeru' ri use'man nito' tarawasomanin pe eke pe Penaro' Ekonekan nito' awon kon use'man nito' tarawasoma entai, miri awonsi'ki itosoruwano pe, Sises poro apurinin epika'ti makoi, enari'ke' pe te'to' miri awonsi'ki uma'tan nito' piyapai; Sises si use'man nito' epuru pe esii'ma uya si i'nai ri epika'tin nito' taru, ento' ipi' pe iye'sa' ru'pu iku'to' pe inonkasa' miri awonsi'ki o' ke use'man nito' Ipuru amu' ipuremato' ekareei wini.

Ipan pe tunmenuka'pu ennin nan panama iya apurito' tauya'nokon yau to' uko'manto' pe miyari iu'matu pu'ku pona, Sises pi' tenu kon tutuse, miri awonsi'ki imoronkanin pe i'ri ri ekota'man nito' esi a'tai miri awonsi'ki isi yau tuku'to' kon eporo tauya'nokon a'tai. Kareta uta'koro panaman nito' miri awonsi'ki isi te'ku'ton pi' to' pana'ti pe.

Iyawon Ekamanin

Ekamanin: Kurai iyenuka'sa' pe kuru ri Papa usenpoikato' iwini (1:1-3)
Eke pe Kurai e'to' inseru amu' entai (1:4—2:18)
Eke pe Kurai e'to' Mosi' miri awonsi'ki Isa'suwa entai (3:1—4:13)
Eke pe Kurai e'to' use'man nito' tarawasomato' iya yau (4:14—7:28)
Eke pe Kurai e'to' emenna' tekonekasa' yau (8:1—9:22)
Eke pe Kurai e'to' use'man nito' pe te'to' yau (9:23—10:39)
Eke pe kuru apurito' esi (11:1—12:29)
Papa pori'mato' (13:1-19)
Uta'koron pe ipureman nito' (13:20-21)
Iu'matu main (13:22-25)

Imu Eke Inseru Amu' Entaino

1 ¹Pena Papa uya utamokori kon amu' auro'kapi'pitu'pu pu'kena' amu' poro taron ni a'tai'ne, tu'kan wini ri, ²e'tane si seri ton iu'matu weyu ton a'tai'ne

uyauro'kasa' iya 'nokon Tamu wini, tunanumu'pu tanporon ni anunnin pe iye'to' pe, iporo tanporon ni mi yawiron kaa'pu iya na'ne'. ³Imu esi te'wei'tisen Papa a'kwarii ke, miripan esi kuri ri e'to' e' pe kuru ri, merunti imaimu erupa' ri tanporon

ni uko'mamu miyari. Makoi
 ekorukato' turu tupo, iyereuta'pu
 Eke emiyatu enwo'netu wini Epan
 po. ⁴Miripan si ena'pu eke pe inseru
 amu' entai, tese' tnanamtu'pu esi
 eke pe to' ese' entai kasa.

⁵Apune para, nai kari warai
 inseru pi' ken Papa,

“Umu imiri tikin nan kuru
 ri; seri pe ikuipunu pe
 enasa;”^a

tawon? Miri pe para kanan,

“Ikuipunu pe e'to' oton,
 miri awonsi'ki umu pe
 iye'to' oton;”^b

tawon? ⁶Miri awonsi'ki kanan,
 timurewato' ennoko Papa uya a'tai
 non pona,

“Tiwi tanporo Papa inseruui
 ton napuripitui;”^c

ta'pu iya. ⁷Inseru amu' pi'
 tausauroku a'tai,

“Uinseruui ton kupu uya
 a'setun pe,
 upoitoru ton apo'
 e'werouwerouma pe;”^d

ta iya. ⁸E'tane si Imu pi',

“Papa, ayapon e'to' oton inke
 ri, inke ri,
 miri awonsi'ki ipokena'
 pe e'nito' itesa' pe iwesi
 yuu' pe.

⁹Ipoken e'nito' i'nunkasa' auya,
 ipoken para e'nito'
 ewaruma'tisa' auya;
 miri pe iyese pi', Papa,
 itese' pi' iwe'to' uya

iku'sa'

itonpa ton epoi,

imiri tukarapaimai' pori'

pe iwesi ekamanin pe;”^e

ta iya. ¹⁰Tasa' iya ri mari,

“Itepuru, iyepiya'ti yau non
 apon nonka'pu auya,
 miri awonsi'ki ka'

esi iyemiyatu ton
 turawasooi ru'pu ton pe.

¹¹Tuma'ta ton ni, imiri moro ri;
 tanporo pon a'mota kasa
 ta'mota ton.

¹²Pon puro'pon e'mepitu kasa
 e'mepi'to' auya oton;
 pon usensima kasa
 isensimato' oton.

E'tane imiri moro miri kasa ri,
 iukiii'pamu pen ni;”^f

ta iya. ¹³Nai kari warai inseru pi' ken,

“Ereutaki, uyemiyatu
 enwo'netu wini

iyeyaton non turu uya pu'ku
 pona

a'ta apon pe;”^g

tawon Papa? ¹⁴Inseru amu' pen pe'
 kamoro a'kwaru ton e'turawasomai'
 enno'sa' kon kamo epika'tin nito'
 eponin nan apiyo' pe?

Panaman

Pana Tutuse E'nito' Pe

2 ¹Miri pe iyese pi', etasa'
 ru'pu pi' upana kon tutuse
 e'nipai'nokon, utano'man pe iyese
 namai'. ²Apune para inseru amu'
 usauro'sa' ru'pu e'sa' pe iyese yau

^a 1:5 Eren 2:7 ^b 1:5 2 Sanweru 7:14; 1 Karonokurus 17:13 ^c 1:6 Isutaronomi 32:43
 (LXX) ^d 1:7 Eren 104:4 (LXX) ^e 1:8-9 Eren 45:6-7 ^f 1:10-12 Eren 102:25-27 (LXX)
^g 1:13 Eren 110:1

iyawiri e'nito' kuru, miri awonsi'ki tanporo miri ton i'kwi'sa' pe miri awonsi'ki iyawiri p̄ra e'nisa' uya ipoken ni t̄kota'mato' eposa' yau, ³nai kasa ekota'man nito' apai ain̄n̄n̄ ni eke ri epika'tin nito' an̄nsa' p̄ra iye'tane? Seri epika'tin nito', wapiya kuru Iteperu nekama'p̄ra r̄p̄ra, miripan akonomasas' etanin n̄'san uya upana kon ya'. ⁴Papa uya ri kanan ekamasas' miri pona ento' ipikiri ke, enuminkanin ke, miri awonsi'ki ti'tui' p̄ra eke t̄t̄urawasooi ton ke, miri awonsi'ki Wak̄ A'kwar̄ n̄t̄p̄it̄n̄ ton t̄t̄p̄i'se i'se te'to' awiri.

**Sises Ekoneka'p̄ra
Takon Non Kasa**

⁵Inser̄ am̄' ena' or̄ t̄uue'ton nonkasa' iya p̄ra iyese, itesa' pe to' e'to' pe, usauro'ni na'ne'nokon ipi'. ⁶E'tane, moro ipata esi miri ka'pon uya ekamasas' na'ne' iyai ri:

“Nai pan ka'pon ipi'
iusewankama pa,
miri pe p̄ra ka'pon mu
imainanpa pa?”

⁷Mara r̄'kwi' aiko pe ikoneka'p̄ra auya inser̄ am̄' o'no;
ar̄ko'ti'p̄ra auya eke
pe iku'to' ike ke miri
awonsi'ki
inamato' ike ke;

⁸miri awonsi'ki tanporon ni nonka'p̄ra auya i'ta o'koi!,”^h

tawon. Tanporon ni nonka t̄uuya yau iyo'koi', Papa uya i'ri ri nonkasa' p̄ra iyese innonka'p̄ra pen itena'. Miri ri e'tane, tanporon esa' pe ene p̄ra ri iyese. ⁹E'tane Sises ene'nokon, mara r̄'kwi' aiko pe inser̄ am̄' o'no ikonekasa' r̄'p̄ra, itar̄ko'tisa' si a'kwa ke miri awonsi'ki inamato' ke, ar̄ne p̄ra uma'tan nito' yau iyekota'masa' pi', Papa uya wak̄ nonkasa' wini tanporon kon iwano' pe uma'tan nito' i'tuto' pe iya.

¹⁰Wak̄ pe ri Papa esi'p̄ra tu'kan kon t̄munki am̄' nee'p̄ra iya eke pe to' ku'to' ya', Sises ri k̄ri ri itiwano' miri awonsi'ki iporo tanporon ni uko'manto', uya to' epika'tito' esa' kuu'p̄ra wak̄ pe iyenato' pe iyekota'ma wini. ¹¹Asa'ri ri k̄ri wak̄ pe ka'pon am̄' konekanin miri awonsi'ki kamoro wak̄ pe ikonekasa' kon esi tikin ni ri iyam̄t̄u pe. Miri wenai, Sises ipiyit̄ p̄ra iyese takon non pe to' esaku t̄uuya pi'.

¹²“Iyese' ekama uya miri
uyakon non pi';
iyam̄rasa' kon rau
ayapuripit̄ pe
userenka miri,”ⁱ

ta iya. ¹³Miri awonsi'ki kanan,

“Apurito' uya pe iyese miri.”^j

Miri awonsi'ki,

“Seri yau e'ai', Papa n̄t̄ur̄'san
m̄re am̄' pokon pe,”^k

takap̄ra iya.

¹⁴Kamoro si m̄re am̄' esi pi' ka'pon am̄' pe, t̄p̄un ke miri awonsi'ki t̄m̄n̄ ke, to' kaisa ri iyekoneka'p̄ra, t̄uma'ta wini

^h 2:6-8 Eren 8:4-6 (LXX) ⁱ 2:12 Eren 22:22 ^j 2:13 Aisaya 8:17 ^k 2:13 Aisaya 8:18

uma'tan nito' meruntiru esa' pe te'sen—Makoi—ma'tanu'to' pe tauya, ¹⁵kamoro ita'sisa' pe te'san uma'tan nito' pi' enari'ke' pe tesa kon wini mo'ka pe. ¹⁶Inai ri sa'ne si iyese inseru amu' pika'ti iya pen, e'tane Epura'an payan ton pika'ti iya. ¹⁷Seri wenai takon non kasa iyekoneka'pu tanporon yau ri, isentu'kena' pe miri awonsi'ki Papa Maimu awiron pe use'man nito' tarawasomanin epuru pe te'to' pe, iyapiyo' pe tesa yau, ka'pon amu' konekanin pe ipokon pe to' makooi apai.¹ ¹⁸Apune pura kuri ri niri ekota'ma'pu Makoi uya i'tupitu a'tai, kamoro nin si Makoi ni'tupitunu ton pika'ti iya miri.

Sises Eke, Mosi' Entaino

3 ¹Miri pe iyese pi', waku ton utonpa ton, Papa naki'ma'san, iusenuminkato' kon ikonekati' Sises pi', itekare ekamai' enno'sa' miri awonsi'ki Papa ena' use'man nito' tarawasomanin epuru, ina nekamanu. ²Tanunnin pi' tausauroku'pu awiri iyese'pu, Mosi' esi'pu kasa tausauroku'pu awiri tanporon yau Papa iwu' tau. ³Sises i'tusa' esi'pu eke pe tunamansen pe Mosi' entai, iuti aminin uya tunamato' eporo kasa eke pe iuti nama entai. ⁴Apune pura tanporo iuti ton amisa' miri ka'pon uya, e'tane Papa esi tanporon ni aminin pe. ⁵Mosi' esi'pu tausauroku'pu awiri ipoitoru pe tesa pi' tanporon

yau Papa iwu' tau, ekama pi' seri enta' usauro'nito' ipi' pe te'sen. ⁶E'tane Kurai esi tausauroku'pu awiri imu pe, Papa iwu' esa' pe. Miri awonsi'ki uri'nokon esi itiwu' pe, uta'sin nisa' pe iyese yau enari'mura e'nito' pi' miri awonsi'ki e'ku'nito' utapurin na'ne' ipi' pi'.

Panaman

Apurinin Pe Pura E'ni Namai'

⁷Miri si, Waku A'kwaru nikayai'ne' kasa:

“Seri pe, imaimu eta
auya'nokon pe iyese yau,
⁸ iyewan kon

ku'sa'mantanu'tuu,
iiwari'nokon e'pai iwesi'pu
kon kasa,

ii'tuto' kon a'tai rimono' tau,

⁹ ikuipunu kon amu' uya
ui'tupitu'pu miri awonsi'ki
ui'tu i'se to' esi'pu na'ne'
yau,

miripan kon uya
unkupunu ene'pu ⁴⁰
kaisa ri wuipiya yau.

¹⁰Miri pe iyese pi', miri a'taino
kon pi' usakorota'pu,
miri awonsi'ki,

‘Tautano'masen ni to'
ewan,

uyeseru i'tusa' to' uya
pura ri iyese,' ta'pu uya.

¹¹Miri si, usakorotasa' yau
usauroku'pu kuru ri,

¹2:17 ka'pon amu' konekanin pe ipokon pe to' makooi apai; miri pe pura, Papa uya kota'man nito' i'ni'panu'nin, umakooi kon mo'kanin.

3:2 Nonpa 12:7

‘To' ewonto' oton pen ni
umoronka'to' ya!, ta'pu
uya,”^m

tawon.

¹²Ti'tui' e'ti', utonpa ton, iri pe inu' ri kuse'nin, apurinin pe pura itewan tera'tisen pe Papa tuko'mansen piyapai. ¹³E'tane wai kaisa ri itonpa kon ipori'mati', “Seri pe,” tato' esi koro'tau, makoi uya enku'tin nito' uya asa'mantanuku kon namai'. ¹⁴Kurai pokon pe enan nisa' seri uta'sin nisa' merunti pe wapiya uyenu kon yau iye'sa' ru'pu pu'ku pona. ¹⁵Seri pe kuru ta nesiine' kasa:

“Seri pe imaimu eta
auya'nokon pe iyesei yau,
iyewan kon
ku'sa'mantanu'tuu
iiwano' kon pe e'pai iwesi'pu
kon a'taino kasa,”ⁿ

tawon.

¹⁶Inu' yan uya eta'pu miri awonsi'ki tiwano' kon pe e'pai to' ena'pu? Kamoro pen pe' Mosi nari'san Isi' apai? ¹⁷Miri awonsi'ki inu' yan pi' isakorota'pu 40 kaisa ri wuipiya? Kamoro pen pe' imakoitasa' kon rimono' tau, itekepu pe ita'po'sa' kon? ¹⁸Miri awonsi'ki inu' yan pi' Papa uya usauroku'pu to' ewonto' oton pen pi' tumoronka'to' kon ya' ta? Kamoro pen pe' imaimu awiron kon nu'san pen? ¹⁹Miri si ene'nokon to' ewomu pokon pura iyesei'pu, apune pura to' uya apuri pura iyesei pi'.

**Sapa' Pi' Papa Munki Amu'
Umoronka'to'**

4 ¹Miri pe iyesei pi', moro ri mari isauro'sa' ipi' umoronka'nito' esi pi', ti'tuse e'nipai'nokon eporo pokon pura auta'mo'kasa' kon esi namai'. ²Uri'nokon ni niri pi' itekare usekayasa' miri, to' esi'pu na'ne' kasa; e'tane itekare to' neta'pu esi'pu i'ri pe pura ri to' pona, apune pura kamoro etanin nu'san uya a'si'sa' pura iyesei'pu apurito' tuuya'nokon pokon pe. ³Seri pe nin si uri'nokon apurinin nu'san ewomu miri umoronka'nito' ya', Papa uya tasa' na'ne' kasa,

“Miri si ekama'pu uya
usakorota pe usauroku
yau,

‘To' ewonto' oton pen ni
umoronka'to' ya!’”^o

tawon. Miri awonsi'ki iturawasooi ri u'ma'sa' e'tane non e'kaa'pu si'kiri. ⁴Apune pura isauro'sa' mi airi ri 7 pe iku'nin wai pi' se ton main yau: “7 pe iku'nin wai yau Papa ereuta'pu tanporo tu-turawasooi ton apai,”^p tukai'. ⁵Miri awonsi'ki seri na'ne' epoi te'sen yau ta iya, “To' ewonto' oton pari pen ni umoronka'to' ya!,” ta.

⁶Moro ri iyesei taron kon ni ewonto' oton miri umoronka'nito' ya', kamoro ipana ya' itekare usekayasa' kon nu'san ewonsa' pura iyesei, apune pura main

^m 3:7-11 Eren 95:7-11 (LXX) ⁿ 3:15 Eren 95:7-8 (LXX) ^o 4:3 Eren 95:11; apune, v. 5 niri enka'ki. ^p 4:4 Iseneses 2:2 apune, v. 10 niri enka'ki.

3:16-18 Nonpa 14:1-35

awiri p̄ra to' esa' pi'. 7Miri pe iyese pi', Papa uya kanan t̄ron ni w̄i t̄ka'sa', "Seri pe," tato', emenn̄'p̄ kuru ri isaurok̄'p̄ Tepi' poro, wapiya ri ta nesiine':

"Seri pe, imaimu eta
 auya'nokon pe iyese yau,
 iyewan kon
 ku'sa'mantan̄'t̄u,"^a

tukai'. 8Ap̄ne p̄ra Isa'suwa uya to' umoronka'to' pe to' ku'sa' yau, Papa n̄sauro'kap̄i'no pen kanan t̄ron ni w̄i pi'. 9Moro ri iyese Sapa' pi' umoronka'nito' Papa munki am̄' iwano'; 10ap̄ne p̄ra in̄' ri tewonsen Papa umoronka'to' ya' ri kanan umoronkap̄ miri tiwano' t̄t̄rawasooi apai, t̄t̄rawasooi apai Papa esi'p̄ kasa. 11Miri pe iyese pi', ewon nito' kon pe usi'tunpai'nokon kuru ri miri umoronka'nito' ya', in̄' ri uta'mo'ka pe iyese namai' Esuwer̄ am̄' n̄kuu'p̄ main awiri p̄ra te'se rimono' tau pikiri te'se.

12Ap̄ne p̄ra Papa maimu esi nurinan miri awonsi'ki iku'nin. Iyike' isi'rato'i pokon iyi supara entaino, ewan miri awonsi'ki a'kwar̄ ri i'monin, i'p̄ miri awonsi'ki ku'naai ri; ewan eseru miri awonsi'ki usenuminkan nito' aimenkanin ni. 13F̄ri ri tanporo iye'ka'sa' yau na'ne' e'so'nam̄ p̄ra ri iyese Papa enu apai. Tanporon ni e'niponkasa' miripan esi kipo'po ri kuri usekaman nito' kuru ri ipi' enu yau.

Sises, Eke Kuru Use'man Nito' T̄rawasomanin Epuru

14Miri pe iyese pi', eke kuru si use'man nito' t̄rawasomanin epuru esa' pe e'ni pi', itisa' na'ne' Ep̄n pona,^r Sises, Papa Mumu, uta'sinpai'nokon merunti pe ekama na'ne' apurito' pi'. 15Ap̄ne p̄ra use'man nito' t̄rawasomanin nan epuru upi'nokon i'si'm̄ra e'ni pi' t̄usentu'masen pen pe p̄ra te'sen esa' pe e'ni pi', e'tane uri'nokon kasa ri mari tanporon yau ri i'tupi'nito' yau iye'sa' r̄'p̄—e'tane ri imakoitasa' r̄'p̄ pen. 16Wak̄ nonkasa' na'ne' apon pona riken utinpai'nokon uyenu kon yau te'se, isentu'mato' miri awonsi'ki wak̄ nonkasa' iya epoto' pe upika'tinin kon pe upika'tinin kon i'se kuru e'ni a'tai.

5 1Tanporon kon ni Papa ena' use'man nito' t̄rawasomanin nan epuru ton esi an̄sa' kon pe ka'pon am̄' koro'tapai, miripan esi an̄sa' pe to' iwano' pe iku'nin pe Papa winikui' te'sen, to' n̄t̄run̄ miri awonsi'ki to' use'mato' ike makoi esi pi'. 2I'si'm̄n yai esii'ma kamoro i'tu iya p̄ra na'ne' nan koneka iya miri awonsi'ki n̄t̄ano'mayai'ne' nan, ap̄ne p̄ra t̄miri esi pi' i'si'm̄ra e'nito' yau. 3Seri wenai t̄makooi iwano' pe t̄use'mato' t̄r̄ iya, ka'pon am̄' makooi iwano' pe ri niri it̄r̄ iya.

^a 4:7 Eren 95:7-8 (LXX) ^r 4:14 Ep̄n pona; miri pe p̄ra, Ep̄n awiri

4:8 Isu'taronomi 31:7; Isa'suwa 22:4 4:10 Iseneses 2:2 5:3 Ripaiti'kas 9:7

4Inu' uya ri seri itepuru pe e'ni namato' anumu p̄ra iyese tiwano' pe; Papa uya riken iki'ma, Eran esi'p̄ra kasa. 5Miri kasa ri mari, K̄rai, tiwano' pe eke pe t̄ku'to' ipi', Papa ena' use'man nito' t̄rawasomanin nan epuru pe iyena'p̄ra pen. E'tane Papa uya,

“Umu imiri t̄ikin nan kuru ri; seri pe ikuip̄nu pe enasa' seri,”^s

ta'p̄ra. 6T̄ron ni airi,

“Imiri esi Papa ena' use'man nito' t̄rawasomanin pe inkerō' pe ri, Meru'kisite' kasa kuru ri,”^t

tasa' iya.

7Sises uko'mamu a'tai non po, iyip̄remap̄itu'p̄ra, isennap̄itu'p̄ra eke pe t̄uki'pi'n̄npi'se, tenuku'mi tenno'se k̄ari, t̄ap̄ika'tinin pi' uma'tan nito' apai, miripan maimu useta'p̄ra ap̄ne p̄ra iye't̄asa' pi' Papa ena'. 8Imu pe ri iye'tane, main awiron pe te'sen pe isenupa'p̄ra tekota'mato' wini, 9waku pe nin si tekonekasa' ya', iyena'p̄ra nin si inkerō' pe ri epika'tin nito' p̄rakon pe tanporo t̄maimu awiron kon iwano' pe, 10miripan nin si ese'ti'p̄ra Papa uya miri, use'man nito' t̄rawasomanin nan epuru tukai', Meru'kisite' kasa kuru ri.

Panaman Uta'mo'kan Namai'

11Eke pe kuru ina usauro'to' man seri pi', e'tane ekama poken p̄ra ri sa'man pe ri iyese, ap̄ne p̄ra tinin pi' ri t̄ausenupasan pe iwese kon. 12Seri a'tai ri, ti'sa pe iyenasa' kon nesii'no, e'tane iyenupanin kon ni i'se iwese kon iye'sara'ti si'kiri ri kanan Papa Maimu i'nairon pi'. Mana' ri mari i'se iwese kon, sa'man kiyari pen! 13Inu' ri mana' pi' n̄ko'manyai'ne', m̄re pe ri mari na'ne' esi miri ipoken e'nito' pi' usenupan nito' to'ka'n̄u'sa' iya p̄ra ri mari. 14E'tane sa'man kiyari esi miri iyaku'p̄asa' kon iwano' pe, inke apuri t̄uyua'nokon ke isenupasa' kon, waku miri awonsi'ki iri ka' se wa tawon nan pe.

6¹Miri pe iyese pi', e'sara'tin pe K̄rai pi' usenupan nu'p̄ra t̄ninse, iyaku'p̄asa' pe e'nito' ya' utinpai'nokon, iyapon pe kanan era'tin nito' uma'tan nito' ya' anin n̄kup̄nu t̄ka'pai'nokon p̄ra, “ miri awonsi'ki Papa apurito', 2epa'taisiman nito' pi' usenupan nito', ” miya' t̄uto' pi', iyeri'sa' e'mu'sa'kato' pi', miri awonsi'ki siyaro' eseru aimenkato' nonkapai'nokon. 3Iku'pai'nokon, Papa uya ta pe iyese yau.

4Iye'kup̄ra poken p̄ra iyese kamoro a'kwa yau iye'sa' ru'san,

^s5:5 Eren 2:7 ^t5:6 Eren 110:4 ^u6:1 Uma'tan nito' ya' anin n̄kup̄nu t̄ka'pai'nokon p̄ra; miri pe p̄ra, t̄wotori'pi' kenan pen ni eseru apai ^v6:2 epa'taisiman nito'; miri pe p̄ra, ekorukan n̄kup̄nu.

5:4 E'sotas 28:1 5:7 Ma'siu 26:36-46; Ma' 14:32-42; Ɔru' 22:39-46
5:12-13 1 Koren 3:2

Erɔn pon repan nito' onpanin nɔ'san, Wakɔ A'kwarɔ epoka'nin nɔ'san na'po to' uta'mo'kasa' tɔpo. ⁵I'nai ri iyese kamoro wakɔ Papa Maimu onpanin nɔ'san miri awonsi'ki seri enta' tɔuye'ton pana'pano. ⁶Miripan kon si uta'mo'kasa' pe iyese yau, i'nai ri iyese to' na'po pɔra iyese, apɔne pɔra^w tɔma'tanɔ'nin kon pe to' uya kanan Papa Mumu pokapi'kapɔ kurusu' pona, miri awonsi'ki annau to' uya ipiyi'nɔ'kapɔ ri mari.

⁷Non inke ri tɔpona tɔuta'mo'kasen tuna ensinin miri awonsi'ki kiyari konekanin kamoro iyemaina'tisa' kon iwano' pe, uya Papa uya tɔpɔremato' eporo. ⁸E'tane non, imi'ni'ta miri awonsi'ki a'sini'ta a'tanɔ'nin esi miri iri pe, isi tɔpa'nɔ'se' yau. Iu'matɔ yau tepo'ti ton pe.

⁹Seri kasa ri ina usauro'tane, utonpa ton amɔ' rɔ'kwɔ, ina enu yau ri wakɔ iwa ton esi imiri'nokon pi'—wakɔ ton epika'tin nito' pikiri nɔye'ai'ne'. ¹⁰Papa kari ri ipoken pɔra iyese ta pokena' pen ni ipi'; itɔrawasooi kon nɔ'pɔ miri awonsi'ki i'nɔnkato' auya'nokon inenpoika'pɔ kon imunki amɔ' pika'ti'pɔ auya'nokon, miri awonsi'ki ikupɔ pi' ri me'atɔi'ne' pu'tika'nɔkɔ iya pen ni. ¹¹Ina man akaisari'nokon seri kuru kupɔ auya'nokon i'se ari'kena' pe iu'matɔ pona ri, iye'ku'to' kon konekanin

pe i'nai ri. ¹²Emiya'ne' pe iyena kon i'se pɔra ina man, e'tane kamoro apurito' miri awonsi'ki tɔuseta'kai' pɔra ipi' usauro'nisa' rɔ'pɔ eponin nɔ'san kasa e'ti'.

I'nairon Papa Usauro'sa' Rɔ'pɔ Iku'to' Pe Tɔuya

¹³Papa uya Epɔra'an auro'ka a'tai tɔnku'ton pi', tɔnesa'ton eke tentaino pɔra iyese pi', tɔmiri pe ri iye'sesakɔ'pɔ, ¹⁴“Uri pe kuru ri ipɔrema uya miri awonsi'ki tu'ke ri apayanɔ'ti uya,”^x tukai'. ¹⁵Miri pi' si tɔuseta'kai' pɔra tenurikɔ tɔpo, Epɔra'an uya si iye'kupɔ tukai' tauro'kasa' rɔ'pɔ eporo'pɔ.

¹⁶Ka'pon amɔ' uya tɔnkupɔnɔ kon ekama eke pe tentai'nokon te'san ese' yau, miripan uya nin si isauro'sa' rɔ'pɔ meruntitanɔkɔ miri, miripan uya tanporon ni e'sei'pi'nito' ereutanɔkɔ. ¹⁷Apɔne pɔra tɔnekama'pɔ usensima pɔra iyese tukai' epoton kon uya i'tu i'se tesi wenai, tɔusaurokɔ'pɔ akonoma'pɔ iya ikupɔ uya kuru tukai'. ¹⁸Papa uya seri kupɔ uya tasa', miripan e'kupɔ kuru ri tasa' iya. Seri asa'ron usensima pɔra iyese, apɔne pɔra kasi pe Papa esi poken pɔra iyese. Miri pe iyese pi', uri'nokon yainɔnsa' kon inota' e'se'na uya emenna' pe merunti pe e'nito' anɔmɔ, apɔne pɔra uta'sin ke isauro'sa' pi' miri itenu yau esii'ma. ¹⁹Seri si e'ku'nito' esi uya'kwarɔ kon a'sinin pe, pana'

^w 6:6 *apɔne pɔra*; miri pe pɔra, *koro'tau*. ^x 6:14 Iseneses 22:16-17

6:8 Iseneses 3:17-18

pe, aka'ne' pe pen. Tewonsen siya ri iwapu enta', ²⁰Sises, ewomə'pə urawiri'nokon, uiwano' kon pe na'ne' ya'. Iyenasə' si Papa ena' use'man nito' tərawasomanin nan epuru inkerə' pe, Merə'kisite' kasa kuru ri.

**Merə'kisite', Papa Ena'
Use'man Nito'
Tərawasomanin**

7 ¹Puse ri Merə'kisite' esi'pə Seren po kin pe miri awonsi'ki use'man nito' tərawasomanin pe, Eke Kuru Papa iwano' pe. Epura'an eporo'pə iya kin amə' ewa'noma tupo to' enu entai tenai' iyenna'po koro'tau, miripan pərema'pə iya, ²miripan repa'pə Epura'an uya 1/10 kaisa ri tanporon apai. Itese' wapiya na'ne' esi miri, "Ipoken te'sen kin," ta e'kwa pe; "Seren pon kin," ta esi kanan, "kin, tausewankamai' pəra e'ni esa'," ta e'kwa pe. ³Kuri ri mu ru'pə miri pe pəra kamoro imunki ru'san ta poken pəra ri iyese Merə'kisite' pi', iweyu epiya'ti'pə pəra ri miri pe pəra iko'manto' u'ma'sa' tato' pəra ri iyese, Papa Mumu kasa ri, use'man nito' tərawasomanin pe moro ri iyese inkerə' pe ri.

⁴Eke pe kuru ri iyese'pə, tapai: Epura'an, utamokori kon uya irepa'pə 1/10 kaisa ri teyatən non enapai tənmo'ka'pə ke! ⁵Main, Mosi' winon nin si esi Ripai payan use'man nito' tərawasomanin nan pe iyenasə' kon uya 1/10 kaisa ri to' uya aməranə'to' pe ka'pon amə' piyapai—tətonpa kon amə'

ri—Epura'an si'kiri ri to' u'tisa' e'tane. ⁶Puse ri ka'pon uya Ripai pa pe te'to' e'ma'pəkasa' pəra ri iye'tane, miri ri e'tane 1/10 kaisa ri Epura'an wini aməranəku'pə iya miri awonsi'ki ipərema'pə iya, Papa uya tauro'kapi'sa' ton nə'pə esa' pe te'sen. ⁷Ikasima pəra, aiko pərema'pə eke pe te'sen uya. ⁸Tikin nan esi 1/10 aməranəku teri'san kon ni ka'pon amə' uya; e'tane tərən ni pe kəri, nurine iyese tato' uya aməranəku. ⁹Ka'pon uya ri ta poken iyese, Ripai kəri ri 1/10 aməranəku pi' na'ne' uya 1/10 e'ma'pə Epura'an poro, ¹⁰apəne pəra Merə'kisite' uya Epura'an eposa' a'tai, Ripai esi'pə tətamokori pun yau ri mari.

Sises, Merə'kisite' Waraino

¹¹Waku pe ekonekan nito' e'seporo pe iyese yau Ripai payan esi use'man nito' tərawasomanin nan pe koro'tau (miri poro main e'turu'pə ka'pon amə' ena'), i'rito' pe ken si tərən ni kanan use'man nito' tərawasomanin uyepə i'se e'ni'pə—Merə'kisite' waraino kuru, Eran waraino pen? ¹²Apəne pəra si Eran poro use'man nito' tərawasomanin ye' pe te'sen usensimasa' a'tai, main ni niri usensimato' pe iyese. ¹³Sises si, seri ton usauro'sa' na'ne' ipi' esi təponaron ni tərən ni ko' ri, miri awonsi'ki miri ko' awon ni e'tərawasomasa' pəra iyese use'man nito' apon po. ¹⁴Apəne pəra i'tu ri uyepuru kon u'tisa' Isuta

ko' wini, miri ko' amü' pi' Mosi' usauro'sa' püra ri iyese use'man nito' tūrawasomanin nan pe. ¹⁵Miri awonsi'ki ina uya tasa' na'ne' esi wakü pe tenka'sen pe ri, tūron ni use'man nito' tūrawasomanin Merü'kisite' waraino usenpoikasa' pe iyese yau, ¹⁶küri use'man nito' tūrawasomanin pe iyenasa' main wini itamokori ton e'sa' wenai pen, e'tane tu'ma'sen pen uko'man nito' meruntirü wini. ¹⁷Apüne püra isekamasa':

“Imiri esi use'man nito'
tūrawasomanin pe inke ri,
Merü'kisite' kasa kuru ri,”^y
tukai'.

¹⁸Wapiyaro' main, Mosi' winon utamasa' apüne püra i'si'müra miri awonsi'ki pika'tinin pe püra iyese pi' ¹⁹(apüne püra main uya i'ri konekasa' püra iyese wakü pe), miripan wakü pari nin si e'ku'nito' ekamasa', a'ko pe nin si Papa piya' une'nin kon.

²⁰Iye'ku'to' pe ikupü uya ta Papa uya a'kiri iyekonekasa'! Tūron kon use'man nito' tūrawasomanin nan ekonepitu'pü iye'ku'to' pe ikupü uya ta Papa uya a'kiri püra. ²¹E'tane Sises ekoneka'pü use'man nito' tūrawasomanin pe iye'ku'to' pe ikupü uya ta Papa uya a'kiri, ta'pü iya ipi' a'tai:

“Itepuru uya iye'ku'to' pe
ikupü uya tasa',
miripan uya teseru
ensima pen:

‘Imiri esi use'man nito'
tūrawasomanin pe inke
ri.’”^z

tasa' iya. ²²Apüne püra seri tasa' pi', Sises ekonekasa' wakü kuru nin ekonekan nisa' wapiyaro' entaino ekamanin pe.

²³Miri si, tu'ke ri kamoro use'man nito' tūrawasomanin nan esi'pü, apüne püra uma'tan nito' uya to' uko'mamü tūrawasooi kon kupü pi' poken püra ikupü wenai; ²⁴e'tane si, Sises uko'mamü pi' inke ri, aka'nero' pe püra nin si use'man nito' tūrawasomanin ye' pe iyese. ²⁵Miri pe nin si iyese pi', kamoro Papa piya' tūye'san tūporo pika'ti iya miri tenuka'nü'se kuru,^a apüne püra tiwiri ri tūko'mamü pi' to' pona usennan pi'.

²⁶Püse ri warai nin si use'man nito' tūrawasomanin nan epuru uya i'se e'nito' eporo miri—küri wakü pe na'ne', i'ri iri pün ni, esukenan ni, tūmakooikena' nan piyapai iyemo'kasa', ka' enta' ri iyenu'sa'. ²⁷Tūron kon use'man nito' tūrawasomanin nan epuru ton kasa püra iyese, wüi kaisari ri use'man nito' ton tūrawasomato' iya püra iyese, wapiya tūmakooi iwano' pe miri awonsi'ki ka'pon amü' makooi iwano' pe. To' makooi iwano' pe iye'türü'pü tikin ite'kwa tūnakonomaton pe püra ri tūmiri pe use'man nito' ike pe. ²⁸Main uya i'si'münon ka'pon amü' anamü

^y7:17 Eren 110:4 ^z7:21 Eren 110:4 ^a7:25 *tenuka'nü'se kuru*; miri pe püra, *tiwiro'* pe

7:27 Ripaiti'kas 9:7


use'man nito' t̄rawasomanin nan epuru ton pe; e'tane iye'to' pe tawon, iye'sa' na'ne' main ekoneka'p̄u t̄po, uya Imu an̄m̄'p̄u, iyekonekasa' wak̄u pe inkerō' pe.

**Sises, Emenna'
Ekonekan Nito' Epuru**

8 ¹Se kuru sa'ne ta ina uya: P̄use ri warai use'man nito' t̄rawasomanin nan epuru esa' pe e'ni, iyereutasa' r̄u'p̄u enwo'ne' miya' wini eke pe kuru te'sen ye' apon po Ep̄un po, ²te't̄rawasomasen ip̄ureman nito' iw̄u' tau, i'nairon kuru ta'porin, Itepuru ri ni'm̄'sa'ka'p̄u, ka'pon ni'm̄'sa'ka'p̄u pen.

³Tanporon kon use'man nito' t̄rawasomanin nan epuru pe

an̄nsa' uya asa'ri ri t̄t̄usen miri awonsi'ki use'man nito' ike t̄r̄u, miri kasa ri si p̄use ri n̄t̄uton ni mari esi'p̄u. ⁴Non po iyesei yau, use'man nito' t̄rawasomanin pe p̄ura ri iyesei miri, ap̄une p̄ura moro ka'pon am̄' esi pi' t̄t̄usen t̄nin nan pe main uya ekamasa' awiri. ⁵To' e't̄rawasoma Ep̄un pon ip̄ureman nito' iw̄u' a'kwar̄u'p̄u tau ri, ikasa ipatakasa' pe te'sen. Miri pe iyesei pi', Mosi' panama'p̄u miri ip̄ureman nito' iw̄u' ami pi' iyekoneka koro'tau: "Menei!, tanporon ni koneka auya, iyena' w̄u' po enpoika'p̄u na'ne' kasa ento' auya ipi' pe,"^b tukai!. ⁶E'tane Sises t̄rawasooi ineporo'p̄u esi eke pe Mosi' t̄rawasooi entai, wak̄u kuru ekonekan nisa' Papa winon eposa'



To' e't̄rawasoma Ep̄un pon ip̄ureman nito' iw̄u' a'kwar̄u'p̄u tau ri, ikasa ipatakasa' pe te'sen. (8:5)

^b 8:5 E'sotas 25:40

8:1 Eren 110:1

iya tũntũton eke pe penaro' entai,
miripan e'tusa' wakũ ton kuru nin
e'ku'to' pi' isauro'sa' po.

⁷Apũne pũra wapiyaro' ekonekan
nito' esi yau wakũ pe, tũron ni
ne'warinpai'no pen ni. ⁸E'tane Papa
uya iri eporo'pũ tũmunki amũ' pi',
miripan uya ta'pũ,

“Iweyu uye'ni pi' man, ta pi'
Itepuru man,
emenna' ekonekan nito'
konekato' uya weyu
Esuwerũ amũ' pokon pe,
miri awonsi'ki Isuta amũ'
pokon pe.

⁹To' tamokori ton pokon pe
unkoneka'pũ
ekonekan nito' waraino pen,
to' emiya pi' to' a'si'pũ uya
a'taino
to' ato' pe uya Isi' apai,
apũne pũra tũmiri'nokon
pokon pe ekoneka a'tai
tũsaurokũ'pũ kon awiri
pũra to' esi'pũ,
miripan kon piyapai
era'ti'pũ,

ta Itepuru uya.

¹⁰Se si seri ekonekan nito'
konekato' uya Esuwerũ
amũ' pokon pe,
miri pata'pũ pe, ta
Itepuru uya,
Umaimu nonka uya miri to'
usenuminkato' ya'
miri awonsi'ki imenuka
uya to' ewan pi'.

To' e'to' itese' pi' pe e'to' oton,
miri awonsi'ki umunki
amũ' pe to' e'to' oton.

¹¹Seri enta' ka'pon uya tũtonpa
enupato' oton pen,
miri pe pũra ka'pon uya
takon enupato' oton pen,
'Itepuru i'tuki,' tukai',
apũne pũra tanporo to' uya
ui'tuto' oton
sepan kon apai eke ton pe
kuru te'san pona ri.

¹²Iri to' eseru pi' usentu'mato'
oton,
miri awonsi'ki uyenu yau
to' makooi ku'to' uya
oton pen ni miri enta',”^c

tasa'.

¹³Seri si ekonekan nito' esakũ
iya wini “emenna',” tukai',
wapiyaro' ku'sa' iya tapurisen pe
pũra; miripan si tapurisen pe pũra
te'sen miri awonsi'ki ipooi'pi pe
te'sen pũra iyena seri pe ri.

Apuripitũ,

Non Pon Ta'porin Tau

9 ¹Seri si wapiyaro' ekonekan nito'
esi'pũ, teseru ke Papa apuripi'to'
esi'pũ miri awonsi'ki ipũreman nito'
iwũ' seri non pon kanan. ²Ta'porin
i'mũ'sa'ka'pũ. Wapiyaro' iwa'kũ'sa'
tau raan'pu apon esi'pũ, miri
awonsi'ki tepũru miri awonsi'ki
ipũremasa' pũreti; seri esakũ miri
Wakũ Pata, tukai'. ³Isakon pe te'sen
iwapu entau iwa'kũ'sa' kanan esakũ

^c 8:8-12 Iseremaya 31:31-34 (LXX)

9:2 E'sotas 26:1-30; 25:31-40, 23-30

esi'pɔ Ipan Wakɔ Kuru Pata, tukai,
 4miri yau korɔ pun konekasa'
 use'man nito' apon a'po'nan
 kirii'nɔnpato' ipo, miri awonsi'ki
 korɔ ke ipi'pi'tisa' ekonekan nisa' en.
 Seri yau kanan korɔ pun konekasa'
 samaku pe yau “mana” tato' to' yu
 pe iye'sa' rɔ'pɔ esi'pɔ, Eran yɔɔi
 iyenpɔrɔkutasa' rɔ'pɔ, miri awonsi'ki
 ti' amɔ' ekonekan nito' apon ton.
 5Miri iten pɔro'po ika'sa' ton inserɔ
 amɔ' A'kwa iwano' ton esi'pɔ, iri
 pe e'ni'pɔ apai ekonekan pata'se'
 epoino.^d E'tane seri ton ekama poken
 pɔra man tanporo seri pe.

6Seri kasa si ikonekasa' ya',
 use'man nito' tɔrawasomanin
 nan ewomɔ isi'pakiri ri kipo'pon
 iwa iwa'kɔ'sa' ta' tɔtɔrawasooi
 kon ku'se'na. 7E'tane use'man
 nito' tɔrawasomanin nan epuru
 riken ewomɔ i'nawon iwa'kɔ'sa'
 ta' tikin ite'kwa riken wɔipiya
 yau, mɔn esa' pe kuru itito' pe
 iyesi tɔntɔton pe tɔmakooi epe'pɔ
 pe miri awonsi'ki ka'pon amɔ'
 makooi epe'pɔ pe to' nɔkupɔ'pɔ
 i'tui'ma pɔra ri. 8Wakɔ A'kwarɔ
 uya enpoika'pɔ seri wini Ipan
 Wakɔ Kuru Pata e'ma uta'kokasa'
 pɔra iyesi moro ri mari wapiyaro'
 tɔponaron iponaro' ta'porin esi pi'.
 9Seri seri, seri a'taino ekamanin,
 tɔtɔsen, use'man nito' ike itusa'
 rɔ'pɔ uya apuripi'nin nan ewan



*korɔ ke ipi'pi'tisa'
 ekonekan nisa' en (9:4)*

konekasa' pɔra iyesi. 10Kiyari pe
 ri nin miri awonsi'ki tensisen pe
 ri nin iyesi'pɔ, ekorɔkan pe ri—
 kipo'pon eseru pe ri nin emenna'
 eseru weyu e'seporo pona ri.

Kurai Munu

11Kurai uye'sa' a'tai use'man
 nito' tɔrawasomanin nan epuru pe
 waku ton seri yau iyenaka'sa' na'ne'
 ton^e iwano' pe, iti'pɔ eke kuru ipan
 pe wakɔ pe te'sen ta'porin ka'pon
 nɔkoneka'pɔ pen awiri, seri ri ika'sa'
 pɔ'ku ta pen sa'ne. 12Kapirita munu
 miri awonsi'ki paka mɔre munu wini
 iyewomɔ'pɔ pen; e'tane iyewomɔ'pɔ
 Ipan Wakɔ Kuru Pata ya' tikin ite'kwa
 tɔnakonomaton pe pɔra ri tɔmunu

^d9:5 ekonekan pata'se' epoino; miri pe pɔra, pi' wannu usentu'man apon.

^e9:11 iyenaka'sa' na'ne' ton; miri pe pɔra, seri ya' tɔuye'ton.

9:3 E'sotas 26:31-33

9:4 E'sotas 30:1-6; 25:10-16; 16:33; Nonpa 17:8-10; E'sotas 25:16; Isu'taronomi 10:3-5

9:5 E'sotas 25:18-22 9:6 Nonpa 18:2-6 9:7 Ripaiti'kas 16:2-34

wini ri, tiwiro' pe ri uye'mato' kon tepose. ¹³Kapirita amu' munu miri awonsi'ki warawo' pe te'sen paka amu' munu miri awonsi'ki paka mare po'tisa' urumiru'pui taru'pi'sa' kamoro iri pe te'san^f korukanin pe iri apai to' e'to' pe waku pe kipo'po. ¹⁴Miri entai kuru ri nin si Kurai munu, aka'nero' pen Iya'kwaru awiri iye'tusa' ru'pu tiwano' pe tumaku'pi ke pura Papa ena', uya uyewan kon koruka, unku'punu kon uyanin kon uma'tan nito' ya' apai,^g Papa nurinan apiyo' pe e'nito' pe!

¹⁵Seri wenai Kurai esi emenna' ekonekan nito' yau iporo e'nito' pe, kamoro si iki'masa' kon uya iye'kupu' tukai' auro'kasa' kon uya tutusen epoto' pe siyaro' ri—seri si tuma'tasa' pi' to' epe' pe to' mo'kanin pe makoi, to' nukupu'pu' apai wapiyaro' ekonekan nito' o'noro esii'ma.

¹⁶Eri'nisa' a'tai te'nonkasen imamin nu'pu' wanni karetaai esi a'tai, i'nai ri pe' inonka tawon nu'pu' eri'kaa'pu' tukai' ti'tusen pe iyesei, ¹⁷apune pura inonkasa' anunto' pe iyesei, tawon nu'pu' eriku'pu' a'tai riken; nurine tawon nu'pu' e'tane pura. ¹⁸Miri wenai wapiyaro' ekonekan nito' e'kupu' pura iye'pitu'pu' miri mun e'kwansa' pura iye'tane. ¹⁹Mosi' uya tanporon ni apiyontin nito' main yau na'ne' ekama a'tai

tanporon kon ka'pon amu' pana ya', paka munki munu anumu'pu' iya tuna amutu pe, tutariren karimeru i'po' konekasa' miri awonsi'ki i'so'pu ye' tato' panta, miripan uya kareta amon miri awonsi'ki tanporon kon ka'pon amu' pai'pai'ma'pu' ike. ²⁰“Seri seri ekonekan nito' munu, Papa uya ayapiyontisa' kon na'ne' iyawiri iwesi kon pa,”^h ta'pu' iya. ²¹Miri kasa ri mari, ta'porin miri awonsi'ki itau tapurisen i'ri e'kupu' yau pai'pai'ma'pu' iya mun ke. ²²I'nai ri sa'ne main esi tanporon iwa ri ekoruka i'se mun ke, apune pura mun utisa' pura iye'tane makoi pi' usentu'man pura ri iyesei.

²³Iye'ku'to' pe kuru iyesei'pu' Epu' pon patakanin ekorukato' pe iyesei'pu' seri ton use'man nito' ton ike munu ke, e'tane si Epu' po'nann kuru nin si ekorukato' pe iyesei seri entaino use'man nito' ton ike ke. ²⁴Apune pura Kurai ewonsa' pura iyesei Epu' pon patakanin ka'pon nukoneka'pu' ipareman pata'se' ya' i'nairon patakanin ya'; Epu' pona kuru ri nin iyepa'ka'pu', seri pe si tausenoika ton pe uri'nokon iwano' pe Papa piya'. ²⁵Miri pe pura Epu' pona iyepa'ka'pu' e'tupi'se'na kanan pen, use'man nito' tarawasomanin nan epuru kasa Ipan Waku Kuru Pata ya' wuipiya kaisa ri tamunu pen ni esa' pe. ²⁶Kurai ri nin uya e'ne' moronka

^f 9:13 iri pe te'san; ike'ike pe te'san kasa te'san ^g 9:14 Uma'tan nito' ya' apai; miri pe pura, i'ri ku'nin pen ni iku'to' pe iku'sa' apai. ^h 9:20 E'sotas 24:8

9:13 Ripaiti'kas 16:15-16; Nonpa 19:9, 17-19 9:21 Ripaiti'kas 8:15

9:22 Ripaiti'kas 17:11

nesii'no inke ri, non e'kaa'pu si'kiri ri. E'tane si isenpoikasa' tikin ite'kwa tunakonatonon pe p̄ra ri nin, pata weyu u'mat̄u a'tai makoi eno'ma pe t̄amiri ke t̄ause'ma ke. ²⁷Ka'pon erik̄u tikin ite'kwa na'ne' kasa, miri t̄upo eseru aimenkato' epoton pe, ²⁸miri kasa si Kurai e'tur̄u'pu tikin ite'kwa tu'kan kon ka'pon am̄u' makooi mo'kanin pe; miripan usenpoikato' ot̄on iyakon ite'kwa pe, makoi tur̄awasomase'na pen, e'tane epika'tin nito' ne'se'na kamoro tenu-pikiri te'san iwano' pe.

Kurai E'tur̄u'pu Use'man Nito' Ike Pe Tikin Ite'kwa Ri

10 ¹Main, Mosi' winon esi waku ton t̄uuye'sen a'kwar̄u'pu pe ri—t̄uuye'ton kapisin pe iyese. Miri pe iyese pi', kamoro a'ko pe Papa apuripi'se t̄uuye'san koneka iya p̄ra iyese waku pe, miri ri use'man nito' ike utakonomapi'tane w̄uipiya kaisari ri. ²To' konekanin pe iyese yau, use'man nito' ike ereuta'pu nesii'no. Papa apuripi'nin nan ekor̄uka'pu nesii'no tikin nan pari ri, t̄amakooi ke to' n̄usi'tui'no pen ni. ³E'tane nin si miri use'man nito' esi w̄uipiya kaisa ri makoi pi' emiya'pontipi'nin pe, ⁴ap̄ne p̄ra paka, warawo' pe te'sen miri awonsi'ki kapirita m̄un̄u uya makoi mo'ka p̄ra ri iyese ke.

⁵Miri pe iyese pi', t̄uuyep̄u a'tai seri non pona, Kurai uya ta'p̄u:

“Use'man nito' ike miri awonsi'ki tut̄usen i'se p̄ra iwesi'pu, e'tane upun inkoneka'pu; ⁶iyepori'ma p̄ra iyese'pu ipo'ti pe tut̄usen pi' miri awonsi'ki makoi ku'sa' epe'pu pe tut̄usen pi'.



Iyepori'ma p̄ra iyese'pu ipo'ti pe tut̄usen pi'. (10:6)

⁷Miri a'tai ta'pu uya, ‘Moro ri e'ai, Papa, uye'sa' man i'se iwe'to' ku'se'na— iye'menekasa' na'ne' kasa upi' kareta amon pi',” ⁸ta'pu iya wapiya, “Use'man nito' ike miri awonsi'ki tut̄usen, ipo'ti pe tut̄usen miri awonsi'ki makoi ku'sa' epe'pu pe

¹ 10:5-7 Eren 40:6-8 (LXX)

⁹:28 Aisaya 53:12

tutusen i'se p̄ra iwesi'p̄, pori' pe p̄ra iwesi'p̄ ipi',” ta'p̄ iya (main uya ri iye'ku'to' pe tasa' e'tane). ⁹Miri a'tai, “Moro ri e'ai, uye'sa' man i'se iwe'to' ku'se'na,” ta'p̄ iya. Wapiyaro' use'man nito' w̄ruuka'p̄ iya ipikiron pata pe. ¹⁰Miri si i'se iye'to' wini, wak̄ pe nin si ekonekan nisa'nokon, Sises K̄rai pun use'man nito' ike poro tikin nan pari ri.

¹¹W̄ai kaisari ri tanporon kon use'man nito' t̄rawasomanin nan e'soto'kasa' uya t̄t̄rawasooi kon kup̄; miri ri mari akonomapit̄ pi', makoi mo'kanin pen ni. ¹²E'tane nin p̄se ri use'man nito' t̄rawasomanin uya tikin ite'kwa ri use'man nito' makoi iwano' pe t̄r̄p̄ siyaro' pe ri, miripan nin si erutasa' Papa emiyat̄ enwo'net̄ wini. ¹³Miri si'kiri, iyenurik̄ si ti'ta apon pe teyat̄on non koneka enupikiri, ¹⁴ap̄ne p̄ra tikin nan ni use'man nito' ike ke kamoro wak̄ pe tekonekasan konekasa' iya wak̄ pe inker̄o' pe ri.

¹⁵Wak̄ A'kwar̄ uya ri niri seri ekamasa' upi'nokon. Ta iya wapiya:

¹⁶“Seri seri to' pokon pe ekonekato'
miri t̄po, ta Itepuru uya.
Main uiwano' emaika uya to'
ewan ya',
to' usenuminkato' pi'
imenuka uya.”^j

¹⁷Miripan pirik̄ iya:

“To' makooi miri awonsi'ki main uya tato' awiri p̄ra to' nukup̄n̄ kup̄ uya pen uyenu yau,”^k ta iya. ¹⁸Seri ton pi' si usentu'man nisa' pi', makoi ku'sa' pi' use'man nito' p̄ra ri iyese miri.

A'ko Pe Papa Piya' Uye'nipai'nokon

¹⁹Miri pe iyese pi', utonpa ton, ewon ni'nokon Ipan Wak̄ Kuru Pata ya' tukai' uyenu kon yau e'ni'nokon pi' Sises m̄n̄ wini, ²⁰emenna' miri awonsi'ki nurinan uye'ma kon uta'kokasa' pi' iwapu awiri, ipun ni si, ²¹eke si use'man nito' t̄rawasomanin esi pi' Papa iw̄ esa' pe, ²²uye'nipai'nokon si a'ko pe Papa piya' wak̄ pe itewan, apurito' esa' pe uyewan kon yau, iyepai'pai'masa' ukor̄akanin kon pe iri ku'nin n̄p̄ pe usi'tun nito' apai miri awonsi'ki upun kon iyekor̄akasa' pe esukenan tuna ke. ²³Uta'sinpai'nokon pana' pe e'ku'nito' unekaman̄ kon pi', ap̄ne p̄ra isauro'sa' ri esi t̄usaurok̄p̄ awiron pe ri. ²⁴Miri awonsi'ki utonpa kon pi' t̄usenuminkasen pe e'nipai'nokon to' pori'manin pe t̄usi'n̄nkasen pe miri awonsi'ki wak̄ ku'nin pe to' e'to' pe. ²⁵Am̄rap̄i'nito' eseru nonkapai'nokon p̄ra, t̄ron kon n̄nonkayai'ne' kasa, e'tane utonpa kon pori'map̄i'pai'nokon—miyari

^j 10:16 Iseremaya 31:33 ^k 10:17 Iseremaya 31:34

10:11 E'sotas 29:38 10:12 Eren 110:1 10:22 Ripaiti'kas 8:30; Isi'kiyer̄ 36:25

pari apune p̄ra Iweyu e'seporo enkap̄ auya'nokon pi'.

²⁶Ipi' ri te'ku'se umakoitan pi' uko'man ni yau i'nairon an̄nkap̄ t̄apo, miri rupi makoi iwano' pe use'man nito' e'ku'sa' p̄ra iyesi miri, ²⁷e'tane enari'n̄n nito' riken eseru aimenkato' e'seporo pi', isi ri apo', Papa eyaton non po'ti ton. ²⁸Inu' ri Mosi' winon main awiron pen wipit̄u'p̄ usentu'man p̄ra ri ipi', asa'ron kon miri pe p̄ra osor̄wawon kon uya t̄nene'p̄ kon iri kup̄ iya ekamasa' pi'. ²⁹I'ri kaisa ri ken si ka'pon kota'mato' pe iyesi, Papa Mumu wasa'pi'nin ti'ta ke, sepan pe ri t̄konekanin pe te'sen ekonekan nito' m̄n̄u ku'nin, miri awonsi'ki wak̄ nonkasa' Iya'kwar̄ uya sapemanin n̄'p̄ tukai', mi'tuyat̄u? ³⁰I'tu'nokon seri tawon n̄'p̄, "Uri ri e'manin; uri uya ina'po,"^l miri awonsi'ki kanan, "Itepuru uya t̄munki am̄ eseru aimenka."^m ³¹Isi pe ri iyesi Papa nurinan ena' uta'mo'kan.

³²Iyenu kon yau nesii iweyu an̄nsa' auya'nokon a'taino r̄'p̄, merunti pe iye'soto'ka'p̄ kon eke ri sa'man usi'tun nito' annawiri ri. ³³T̄aron ni a'tai annau ri asapemapit̄u'p̄ kon miri awonsi'ki isi pe ri ikota'ma'p̄ kon; t̄aron ni a'tai kamoro miri kasa t̄ku'san pokon pe ri iye'soto'pit̄u'p̄ kon. ³⁴Kamoro pariki'si tau te'san pi'

iuseru'tu'mapit̄u'p̄ kon, iimamin kon ni mo'kasa' e'tane pori' pe ri iwesi'p̄ kon, apune p̄ra i'tu auya'nokon ke wak̄ pari miri awonsi'ki inke t̄uko'mansen iiwano' kon esi pi'.

³⁵Miri pi' iyenu kon yau iwe'to' kon kuseno'mat̄u; eke pe iyepe'p̄ kon eporo auya'nokon miri. ³⁶Sa'man annawiri ri iutito' kon pe iyesi te'nonkai' p̄ra, Papa e'to' i'se ku'sa' auya'nokon a'tai, isauroku'p̄ r̄'p̄ iye'ku'to' pe eporo kon pa.

³⁷Apune p̄ra seri pe iwa'ne ri, "T̄uye'sen uye'ni pi' man, emenn̄'p̄ iyepe' pen.

³⁸E'tane ipokena' e' pe te'sen uko'mam̄ miri apurito' wini.

Tesi'p̄ ya' iyenna'posa' yau, pori' pe ipi' esi pen miri,"ⁿ tasa' iya. ³⁹E'tane uri'nokon kamoro to' kasa tenna'posan pen miri awonsi'ki t̄uma'tasan pen, e'tane kamoro apurinin nan miri awonsi'ki tepika'tisan iye'ton pe te'san.

Apurito' Iwini

11 ¹Seri si apurito' esi miri i'nai ri iyesi tato' e'ku'nito' pi' miri awonsi'ki moro kuru iyesi tato' entane p̄ra ri. ²Seri pi' penaro' kon apuripit̄u'p̄ miri.

³Apurito' wini ito'ka'n̄ku tanporo non ekoneka'p̄ Papa maimu ke, tensen pe na'ne' ekoneka'p̄ tensen penapai. ⁴Apurito' wini Eper̄ uya

^l 10:30 Isu'taronomi 32:35 ^m 10:30 Isu'taronomi 32:36; Eren 135:14 ⁿ 10:38 Apa'ka' 2:3-4 (LXX)

10:27 Aisaya 26:11 (LXX) 10:28 Isu'taronomi 17:6; 19:15 10:29 E'sotas 24:8
11:3 Iseneses 1:1; Eren 33:6, 9; Isaan 1:3

wakü tause'mato' tärü'pü Papa ena' wakü Keen näturunü entaino. Apurito' wini apuripitü'pü ipokena' e' pe te'sen tukai', Papa usauro'sa' a'tai wakü pe inturunü ton pi'. Miri awonsi'ki apurito' wini isaurokü ri, teri'sa' ri e'tane.

⁵Apurito' wini Iino' enuku'pü seri yau uko'man nito' apai, eri'nito' i'tu tūyua namai'; iye'seporo pūra ri iyese'pü, apüne pūra Papa uya anamü'pü. Apüne pūra itanamü rawiri, apuripitü'pü pori' pe Papa ku'nin tukai'. ⁶Apurito' pūra iye'tane pori' pe Papa kupü auya pūra iyese, apüne pūra inu' ri ipiya' tūyue'sen uya apurito' pe kuru iyese moro iyese tukai', miri awonsi'ki i'nai ri tawarinpanin nan e'ma iya tukai'.

⁷Apurito' wini Nowa esi'pü, tapanama a'tai tūsensen pen ni pi', Papa nama tūyua pi' a' kaa'pü iya tamütü pokon pe tepika'tito' yau. Iko'manto' wini apurito' yau non pon kon eno'ma'pü iya, e'tane Papa uya tanamü kuu'pü iya ipokena' pe e'nito' anannin pe apurito' iya wini.

⁸Apurito' wini Epūra'an, tuki'masa' a'tai tūtito' pe pata tūpata'se' pe itūton ya', uya apuri'pü miripan uti'pü, miri ya' uti tukai' i'tui'ma pūra ri. ⁹Apurito' wini tūpata oton koneka'pü iya usauro'nisa' rü'pü ipi' nono yau, ka'kuran pe ri innon ni pata yau; ta'porin tau iko'manpitu'pü, Aisi' miri awonsi'ki Seko' pokon ni niri uko'mamü'pü miri kasa, miri ri

mari usauro'nisa' rü'pü ipi' eponin nan ipokon pe, ¹⁰apüne pūra eke pata, tapon kenan, Papa nukoneka'pü miri awonsi'ki inami'pü enupikiri tesi kon wenai.

¹¹Apurito' wini Epūra'an, ipan pe kiyyi' pe kuru ri iyenasa' e'tane—miri awonsi'ki Sera ri kanan e'tane umu'tan poken pūra ri—to' ri umu'ta'pü, apüne pūra tūsauurokü'pü awiri Papa esi tukai' apuri iya wenai. ¹²Miri kasa si pūse ri tikin nan ni ka'pon apai, iyeri'sa' pe ri te'sen apai ri, tu'ke ri ipayan ton e'seporo'pü miri, itu'kanoro i'tu poken pūra ri, siriki amü' ka' awon kon miri awonsi'ki wi'si' parau e'pi pon kasa ri.

¹³Tanporo pūsamoro ka'pon amü' uko'mamü ri esi'pü apurito' wini tūuma'ta kon a'tai ri. Usauro'nisa' ipi' rü'pü eporo'pü to' uya pen ni; to' uya riken ene'pü innonsi'ki miripan ereutanükü'pü to' uya. To' uya ekama'pü seri non esi tūpata kon pe pūra tukai'. ¹⁴Ka'pon amü' miri tawon nan esi tūpata kon kuru enupikiri te'san pe. ¹⁵Tänniminü kon tūpata kon pi' to' usenuminka yau, to' ri enna'po'pü nesii'no. ¹⁶E'tane ru'ku, wakü kuru pata, Epün pon enupikiri to' esi. Miri pe iyese pi', Papa ipiyitü pen ni, to' e'to' itese' pi' ta a'tai tūpi', apüne pūra to' pata konekasa' tūyua pi'.

¹⁷Apurito' wini Epūra'an, Papa uya ti'tupitü a'tai, uya Aisi' tärü'pü

11:4 Iseneses 4:3-10 11:5 Iseneses 5:21-24 (LXX) 11:7 Iseneses 6:13-22
 11:8 Iseneses 12:1-5 11:9 Iseneses 35:27 11:12 Iseneses 15:5; 22:17; 32:12
 11:13 Iseneses 23:4; 1 Karonokurus 29:15; Eren 39:12

tause'mato' ike pe. Kari ri si usauro'nisa' ru'pu eponin nu'pu esi'pu tikin nan niken tamu ke use'man pi', 18 Papa uya ri, "Aisi' wini usauro'nisa' kon ipi' apayan ton uye'pu miri,"^o tasa e'tane. 19 E'pura'an uya i'tu Papa uya ri Aisi' i'mu'sa'ka ima'tato' apai tukai', Papa uya ri si Aisi' i'mu'sa'ka'pu iyeriku'pu apai kasa ri si.

20 Apurito' wini Aisi' uya Seko' miri awonsi'ki I'sa p'urema'pu miri enta' to' uko'manto' pi'.

21 Apurito' wini Seko' uya teriku a'tai Isole' munki amu' p'urema'pu to' kaisa ri, miripan e'tunkasa' tuteke'semu putu pona uya Papa apuripitu'pu.

22 Apurito' wini Isole', a'ko pe t'weyu esi pi', isauroku'pu Esuweru amu' utito' pi' Isi' apai miri awonsi'ki t'yi'pu ru'pu ato' pe to' uya ta'kiri'nokon to' auro'ka'pu iya.

23 Apurito' wini Mosi' sanon uya onamu'pu osoruwau kapu iyentu'pu awonsi'ki, ap'ne pu'ra waku pe ru'kwi iyesi ene'pu to' uya, miripan kon esi'pu kin maimu pi' to' enari'numu pu'ra ri.

24 Apurito' wini Mosi' esi'pu, tausemo'kasa' a'tai, Peero ensi mu're ta i'se pu'ra tu'pi'. 25 Papa munki amu' pokon pe tukota'mato' pe iye'kuu'pu, mako' eseru yau pori' pe t'uko'mamu namai' aka'ne' pe ri. 26 Kurai pikiri sapeman nito'

esi epe'kena' pe Isi' pon mamin entai tukai' i'tu t'uya ke, ap'ne pu'ra tepe'pu inepopai tesi pi'. 27 Apurito' wini Isi' nimi'pu iya, kin sakoroo' pi' te'namai' pu'ra; sa'man annau ri ap'ne pu'ra t'ausensen pen ensa' t'uya pi'. 28 Apurito' wini To' Epo' Itito' pi' enta'nan nito' tipiyaruka'pu iya. Miri a'tai, mun pai'pai'mato' pe mu'ra'ta wakapuri pona to' uya ikuu'pu iya, wapiya iyentusa' ma'tanu'nin uya wapiya iyentusa' Esuweru amu' mu're ma'tanuku namai'.




Mun pai'pai'mato' pe mu'ra'ta wakapuri pona to' uya ikuu'pu iya. (11:28)

o 11:18 Iseneses 21:12

11:17 Iseneses 22:1-14 11:20 Iseneses 27:27-29, 39-40

11:21 Iseneses 47:31 (LXX); 48:1-20 11:22 Iseneses 50:24-25; E'sotas 13:19

11:23 E'sotas 2:2; 1:22 11:24 E'sotas 2:10-12 11:28 E'sotas 12:21-30



*Esuweru amu' uya Isuweyu Parau ni'kwiri'nuku'pu
a'mun non poro utin kasa ri. (11:29)*

²⁹Apurito' wini Esuweru amu' uya Isuweyu Parau ni'kwiri'nuku'pu a'mun non poro utin kasa ri; miri kupu i'se Isi' pon kon e'tane, to' aputa'pu.

³⁰Apurito' wini Iseri'ko wekupiri uta'mo'ka'pu, 7 kaisa ri wai iwoi Esuweru amu' utipitu'pu e'soru'mai'ma tapo.

³¹Apurito' wini Reyapu, purata pikiri tekumasen, wini pura iyesi'pu, main awiron kon pen pokon pe, apune pura, ama'ai non ense itisa' kon ereutanu'sa' iya pi'.

³²I'ri ta uya miri enta'? Uweyu pura man, Kitiyan pi', Para' pi', Sansun pi', Ise'ta pi', Tepi' pi', Sanweru pi', miri

awonsi'ki pu'kena' amu' pi' usauroku weyu, ³³apurito' wini esa' wanni pe te'sen pata ton mo'kapi'nin nu'san, isi'kaisa ri ekamura te'san tarawasomapi'nin nu'san, usauro'nisa' ru'pu ipi' epopi'nin nu'san; rayan amu' mata a'kopi'nin nu'san, ³⁴apo' i'ni'panu'pi'nin nu'san, supara yi apai iyainusa' kon; i'si'mura to' e'to' enapi'sa' ru'san merunti pe; pana' pe to' enapitu'pu to' usewa'noma a'tai, miripan kon enapitu'pu innon kon soisaai amu' entai kuru. ³⁵Uri'sami'si amu' uya iyeri'sa' kon tatonpa kon e'mu'sa'kasa' epopitu'pu. Taron kon kota'ma'pu ipan pe tunonka

11:29 E'sotas 14:21-31 11:30 Isa'suwa 6:12-21 11:31 Isa'suwa 2:1-21; 6:22-25
11:32 Eseru Aimenkanin Nan 6:11—8:32; 4:6—5:31; 13:2—16:31; 11:1—12:7;
1 Sanweru 16:1—1 Kin Amu' 2:11; 1 Sanweru 1:1—25:1 11:33 Taniyeru 6:1-27
11:34 Taniyeru 3:1-30 11:35 1 Kin Amu' 17:17-24; 2 Kin Amu' 4:25-37



*Iseri'ko wekupiri uta'mo'ka'pu,
7 kaisa ri wui iwoi Esuweru amu'
utipitu'pu e'soru'mai'ma tupo. (11:30)*

kon i'se p̄ra to' esi pi', waku te'm̄sa'kato' kon epoto' pe t̄uya'nokon te'san teriku kon t̄upo. ³⁶T̄aron kon uya t̄apatakapītu kon moronka'p̄u tari'po'pitu kon, t̄aron kon auronpītu'p̄u pariki'si ta' to' t̄apitu'p̄u to' uya. ³⁷To' wini'p̄u ti' ke; to' sara'mo'p̄u saka ke a'sa'm̄yai; supara ke to' wini'p̄u. To' upinim̄'p̄u karimeru miri awonsi'ki kapirita pi'pi ipon pe, entu'ma', ikota'masa' pe e'ne' pe miri awonsi'ki iri pe ri iku'sa' pe— ³⁸non esi'p̄u waku pe p̄ra ri

to' pona. To' usari'p̄u te'ma ke p̄ra ri rimono'ta awiri, w̄a' poro'ne ri, ti' euta nau'ne ri miri awonsi'ki non euta nau'ne ri.

³⁹Tanporo p̄samoro apuripitu'p̄u to' uya apurito' pikiri, e'tane in̄a' uya ri ipi' usauro'nisa' r̄u'p̄u eporo'p̄u pen ni. ⁴⁰Papa uya miri entaino kuru waku konekasa' uiwano' kon pe, uri'nokon pokon pe riken to' ekonekasa' e'to' pe waku pe.

**Papa Uya Tumunki Amu'
Koneka Main Awiron Kon Pe**

12 ¹Miri pe si iyese pi', tu'ke kuru ri kamoro iye'kup̄u t̄unene'p̄u kon ekamanin nan esi pi' uwoi'nokon, eno'mapai'nokon tanporon ni uko'man̄ku kon pi' na'ne' miri awonsi'ki makoi upi'nokon ita'sisa' na'ne' sa'man pe ri, miri awonsi'ki eka'tun nipai'nokon ikup̄u uya kuru tai'ma eka'tun nito' iyawiri pe iye'ma'kumasa' na'ne' awiri. ²Sises pi' uyenu kon t̄utuse e'nipai'nokon, apurito' piya'tinin n̄u'p̄u miri awonsi'ki waku pe ikonekanin n̄u'p̄u, pori' pe te'to' esi pi' t̄arau kuru' moronkanin n̄u'p̄u, ipiyi'nito' t̄unamai' p̄ra ri, miri awonsi'ki si Papa apon enwo'netu wini iyereuta'p̄u. ³Seri moronka'p̄u iya pi' tewa'noma tane t̄umakooikena' nan ka'pon amu' uya pi' isenuminkati', iusetaka kon namai' miri awonsi'ki iyewan kon mo'ka auya'nokon namai'.

11:36 1 Kin Amu' 22:26-27; 2 Karonokurus 18:25-26; Iseremaya 20:2; 37:15; 38:6
11:37 2 Karonokurus 24:21

⁴Makoi ya' iusewa'noma kon e'suranma yau, imunu kon enno'ka'sa' auya'nokon pura man. ⁵Miri awonsi'ki main, "Umunki amu'," tawon pu'tika'nusa' auya'nokon ipori'mapi'nin kon pe te'sen:

"Mooi, usennakan pe Itepuru uya main awiron pe ikonekato' ku'kupui, iyewan ku'mo'kai iyesseremeku iya a'tai,

⁶ apune pura Itepuru kuri ri tuni'nunkanu ton konekanin main awiron kon pe, miri awonsi'ki tanporon kon tamu pe tunanumunu ton kota'ma iya," ^p

tawon.

⁷Sa'man imoronkati' main awiron kon pe ikoneka kon pe; Papa uya enpoika tamunki pe iwe'to' kon pe. Inu' moro mre esi'pu ikupunu nakonekanu pen main awiri iye'to' pe? ⁸Main awiron pe tukonekasan pe pura iwesi kon yau (taron kon koneka koro'tau main awiron pe), purau pe ri nin iwesi kon miri, i'nairon kon imunki pe iwesi kon pen ni. ⁹Tukupunu kenan kon uri'nokon main awiron pe ukonekanin kon, miri pi' nin si to' namanin nan uri'nokon. Miri entai nin si, Epan pon Kupunu wanni ena' e'tun nito' pe iyese miri awonsi'ki uko'man nito' pe!

¹⁰Ukupunu kon uya main awiron kon pe ukoneka kon aka'nero' pe ri, waku pe taponan'konon te'sen awiri; e'tane Papa uya main awiron pe ukoneka kon waku pe uku'nin kon pe, waku pe iye'to' yau ipokon pe e'nito' pe. ¹¹Main awiron pe e'nito' pe konekan a'tai waku pe pona wanni iyese pen ni, e'tane e'ne' pe ri. E'tane ri emennu'pu ipokena' awiri te'sen pe e'nito', miri awonsi'ki tausewankamai' pura e'nito' aku'pi'naku iya kamoro iwini isenupasa' kon iwano' pe.

¹²Miri pe iyese pi', kuku'ku pe te'sen iyemekon kon miri awonsi'ki i'si'mun iyese'mu kon imeruntitanu'ti. ¹³"Isi'kaisa ri a'ta kon e'ma ikonekati',"^q ise'mesa' pe te'sen utakonomapitu namai', e'tane isepi'tito' pe.

Panaman Papa Nurunpanin Pe E'ni Namai'

¹⁴Tausi'tui' iko'manti' tausewankamai' pura tanporon kon ka'pon amu' pokon pe miri awonsi'ki waku pe te'san pe; waku pe te'san pe pura esii'ma, inu' yan uya Itepuru ene pura iyese. ¹⁵Tense e'ti' inu' uya ri waku nonkasa' Papa uya poremeku namai', miri awonsi'ki i'ne' mi' ri kusatanin ekaman ku'ton miri awonsi'ki tu'kan kon ma'tanu'ton pe. ¹⁶Enti' inu' ri esi namai' tekumasen pe, miri pe pura Papa i'tunin pe pura I'sa kasa, tikin ite'kwa ri tenta'nato'

^p 12:5-6 Ipu'ketu 3:11-12 (LXX) ^q 12:13 Ipu'ketu 4:26 (LXX)

12:5-6 Isopu 5:17 12:12 Aisaya 35:3 12:15 Isu'taronomi 29:18 (LXX)

epe! pe irui pe tesi neporonu kuru karupo'pomanin kasa. ¹⁷Miri pata'pu pe, mi'tuyatui'ne' kasa, seri si tupa'emato' eporo i'se iyese a'tai, inurunpa'pu si. Inkuu'pu ru'pu enna'po poken para iyese'pu, tukaranse tupa'emato' warinpa tane iya ri.⁷

¹⁸Wu' piya' iuye'sa' kon pen ta'pi'sen miri awonsi'ki apo' nupo'tinu; ewarupi ya', ipan ewarupi miri awonsi'ki pana'pan a'setun; ¹⁹turonpi' uturunto' ya', miri pe para main usetato' ya', etanin nan e'to' miyari inetapai para ya', ²⁰apune para tapiyo'masa' kon ipi' moronka tuya'nokon poken para iyese pi': "O' uya ri wu' a'pi'sa' pe iyese yau, ti' ke iwito' pe iyese,"^s tawon. ²¹Nari'pa' ri iyese'pu, Mosi' uya, "Etuipitu utititima pi' man,"^t ta'pu miri pi'.

²²E'tane Sayan Wupu pona iuye'sa' kon, Epan pe te'sen Surusiran pona, nurinan Papa pata'se' eke kuru ya'. Tu'kan kon, tu'kan kon inseru amu' pori' pe iyamurasa' kon piya' iuye'sa' kon, ²³iyimurewato' ton imunki amu' so'sii ta', itese' iye'menukapi'sa' kon Epan po. Papa piya' iuye'sa' kon, tanporon kon eseru aimenkannin piya', ipokena' kon nus'an a'kwarupu ton ekonekasa' waku

pe piya', ²⁴Sises emenna' ekonekan nito' tuneporo'pu tunin piya', man pai'pai'masa' waku pe pari imaimu tausauro'sen Eperu man entai.

²⁵Enti' kari tausauro'sen nurunpa auya'nokon namai'. To' ainumu poken para iye'sa' yau, kari non po tapanamanin kon tanurunpai', miri o'koi' pe' e'ni'nokon upanamanin kon Epan poi piyapai era'tin nisa'nokon yau? ²⁶Miri a'tai, imaimu uya non i'ki'ma'pu, e'tane si seri pe isauro'sa' ikupu tuya pi', "Seri riken pe non niken i'ki'ma uya pen, e'tane ka' ri niri,"^u tasa' iya. ²⁷Main ton, "Seri riken pe," nikayai'ne' uya ekama tusa'ki'masen pe te'sen ama—ika'sa' ton pe te'sen—tusa'ki'masen ton pen nin si e'to' pe moro.

²⁸Miri pe iyese pi', tesa' ke e'nito' yau tusa'ki'masen pen eporo pi', tenki tapai'nokon, miri awonsi'ki Papa apuripi'pai'nokon ipori'manin pe inama miri awonsi'ki eke pe i'tuto' wini, ²⁹apune para, "Papa, itese' pi' e'nito' esi ma'tanu'nin apo' pe ri,"^v tasa' iya.

Iu'matu Pe Panaman Nito'

13 ¹Tusa'nunkai' e'ti' isitonpa pe. ²Kipu'tika'tau ka'karan amu' eretanu'to' pi', miri ku'nin

^r 12:17 *tuneporonu warinpa tane iya ri*; miri pe para, *tupa'emato' eporo i'se iye'tane*.

^s 12:20: E'sotas 19:12-13 ^t 12:21: Isu'taronomi 9:19 ^u 12:26: Akiyai 2:6 (LXX)

^v 12:29: Isu'taronomi 4:24

12:16 Iseneses 25:29-34 12:17 Iseneses 27:30-40

12:18-19 E'sotas 19:16-22; 20:18-21; Isu'taronomi 4:11-12; 5:22-27

12:24 Iseneses 4:10 12:25 E'sotas 20:22

nan taron kon ka'pon amu' uya inseru amu' eretanuku'pu miri i'tui'ma para. ³Pariki'si ta' a'sisa' kon tuku'se iyenu kon yau, to' pokon pe ri a'sisa' pe iwesi kon pe te'ku'se, miri awonsi'ki kamoro isi pe tukota'masan, imiri'nokon ni ekota'ma pe.

⁴Tanporon kon emari'man nito' namai, miri awonsi'ki iyemari'masa' kon nesii tumaimu ru'pu kon awiri, apune para temari'masa' e'tane iyekumasa' ru'pu miri awonsi'ki tanporo tekumasan eseru aimenkato' oton Papa uya pi'. ⁵Parata wenai tauta'kwarukai' para iko'manti', iyenau'nokon na'ne' pi' ri tepori'mai' e'ti', apune para Papa uya,

“Inimi uya para kuru iyese;
inonka uya para kuru
iyese.”^w

tasa'. ⁶Uyenu kon yau si esii'ma ta seri,

“Itepuru esi upika'tinin pe;
enari'numu para ri iyese.
Iri pe ken ka'pon uya
ukupu?”^x

ta'nokon.

⁷Iyepuru kon amu' iku'ti' iyenu kon yau, Papa Maimu ekamanin nu'san ipi'nokon. To' uko'mamu'pu otoripi pi' isenuminkati', to' uya apurito' ipatakapi'ti'. ⁸Sises Kurai kari ri, kari ri ri ko'mamiyau iye'sa' ru'pu, miri awonsi'ki seri pe, miri awonsi'ki inkeri' ri.

⁹Ti'tui' para ri ti'tupi'sen pen ni enupan nito' ayano'mati'nin. Waku

pe ri iyese uyewan kon umeruntitato' pe waku nonkasa' ke, kiyari ri pi' teseru ke e'nito' wini pen, ipi' tenta'nasan pika'tinin pen ni. ¹⁰Moro use'man nito' apon esi ipoi kamoro ta'porin tau te'turawasomasan enta'nato' itau pen ni.

¹¹Use'man nito' turawasomanin nan epuru uya o' manu ru'pu ari Ipan Waku Kuru Pata ya' makoi ku'sa' epe'pu pe tatusen, e'tane nin ipun nu'pu po'ti inni ri puroroi apai. ¹²Miri kasa ri mari, Sises ekota'ma'pu e'ne' pe eke kuru pata mura'taai puroroi entau, waku pe tumunki amu' ekonekato' pe tumunu wini. ¹³Utinpai'nokon ipiya' inni pata apai, ipiyi'nu'nin pe te'sen moronkai'. ¹⁴Apune para seri yau inke tuoko'mansen eke upata kon para iyese, e'tane tuye'ton eke pata enupikiri e'ni'nokon seri.

¹⁵Miri pe iyese pi', Sises poro miyari ri Papa ena' use'man pe apuripi'pai'nokon—muta turawasooi wini itese' pi' tusauro'sen. ¹⁶Waku ku'to' auya'nokon miri awonsi'ki itonpa kon pokon pe te'repai' iwe'to' kon ku'pu'tika'nu'tau, seri warai use'man nito' esi Papa pori'manin pe. ¹⁷Iyepuru kon amu' maimu awiri e'ti', to' pana'pano o'no te'tuse e'ti'. Apa'sima kon pi' to' esi, tausekama ton kon pe Papa pana ya'. To' maimu awiri e'ti' to' turawasooi e'to' pe

^w 13:5 Isu'taronomi 31:6, 8 ^x 13:6: Eren 118:6-7 (LXX)

13:2 Iseneses 18:1-8; 19:1-3 13:5 Isa'suwa 1:5 13:11 Ripaiti'kas 16:27

pori' pe e'nito' pe, e'tape'ne' pe p̄ra, miri uya ipika'ti kon p̄ra iyesei.

¹⁸Ina pona ip̄remati'. Ina uya i'tu ina ewan esi wak̄u pe, ekam̄n ku'sa' ina uya p̄ra miri awonsi'ki tanporon yau ri wak̄u pe t̄namasan pe iko'manpaino kon pe. ¹⁹Iyekama'po uya 'nokon kuru iwip̄rema kon pa, ipiya'nokon enna'poto' pe inke p̄ra.

²⁰Tiwi Papa t̄usewankamai' p̄ra e'nito' esa', siyaro' pe ekonekan nito' m̄n̄u poro iyeri'sa' uyepuru kon Sises i'm̄'sa'kanin n̄'p̄, k̄ri ri eke kuru karimeru am̄' Pa'simanin, ²¹irepai'nokon tanporon wak̄u ton ke i'se iye'to' kup̄u kon pa, miri awonsi'ki tiwi uyau'nokon n̄t̄urawasomai

t̄pori'manin pe te'sen, Sises K̄rai poro, itiwano' pe eke pe iku'to' nesii, inke ri, inke ri. Amen.

²²Utonpa ton, ipan pe iyekama'po uya 'nokon apanamato' kon uya eta kon pa, ap̄ne p̄ra to'ken n̄'kw̄i ri kareta menukasa' uya iyena'nokon.

²³I'tu auya'nokon i'se e'ai' utonpa ton Temu'ti si nonkasa' man. Seri pe iwa iye'sa' yau, iya'kiri uti miri iyense'nokon.

²⁴Miyari ka'ti' iyepuru kon am̄' pi' miri awonsi'ki tanporo Papa munki am̄' pi'. Kamoro I'tari winon kon miyari nikayan ipi'nokon.

²⁵Wak̄u nonkasa' nesii ipiyau'nokon.